

Aes 9.30, inte Glesie de Nativitât di Sante Marie si disarà la Sante Messe par furlan, compagnade dal Grup Corâl "Spengenberg" di Spilimberc e celebrade dai rapresentants des trê diocesis dal Friûl, cun leturis e preieris ancje par sloven e todesc. Cui che nol podarà partecipâ in presince, al podarà stâi daûr in graciis de trasmission speciâl su Telefriuli (canâl 11) che, des 9.30 indenant, e trasmetarà in direte la liturgjie e, subit daûr, la cerimonie civîl cu la trasmission "Il campanile della domenica".

Aes 10.45, finide la funzion, in place Marnico, denant dal Municipi, è sarà la esibizion dal Grup folcloristic "Balarins de Riviere" di Magnan.

Aes 11.00, tal Gnûf Teatri "Bons. Lavaroni" (simpri in place Marnico), e tacarà la celebrazion civîl de Fieste. Al screarà la cerimonie il grup folk rock "Corte di Lunas" cu la esecuzion dal Imni dal Friûl, po dopo si fasarà la leture de Bole imperiâl cu la partecipazion dal Grup storic "Il Barbacane" e i tambûrs de "Cucurbite sonore" di Vençon. Dopo dal tradizional scambi de bandiere fra il sindic dal Comun di Sacîl, che al veve dât acet ae manifestazion tal 2025 e i sindics dai doi Comuns che le ospitin chest an, al sarà il moment salûts des autoritâts. Vie pe cerimonie si presentaran in esclusive ancje il video cu la gnove interpretazion dal Imni dal Friûl, "Incuintri al doman", realizât dal Istitût Ladin Furlan "Pre Checo Placerean" e il video dal innomenât canâl YouTube YoupaITubo intitulât "Parcè che il Friûl si clame Patrie". Finidis lis celebrazions, la zornade e larà indenant a Montenârs.

Aes 13.00 inte aree des fiestis, in Borc Curminie 29, al sarà il gustâ par cure de Pro Montenars, cuntun menù a presit concuardât. Cui che al vûl partecipâ a chest moment, cu la presince di Dario Zampa, al scuen notâsi mandant une e-mail dentri di misdì di joibe ai 9 di Avrîl a: istitutladinfurlan@libero.it.

Des 15.30 indenant, si torne ducj a Dartigne denant dal Teatri Lavaroni, di dulà che e tacarà une interessante cjaminade storiche archeologjiche par cure de cooperative Riscoperte. Il percors al tocjarà il cuel di Sant Martin, il Cjistiel Savorgnan e il parc archeologjic. Ancje in chest câs al covente prenotâsi, mandant une e-mail a: info@riscoperte.it.

"UNE ACUILE IN COMUN"

In ocasion de conference stampe al è stât ancje presentât un video che al mostre cualchidune des tantis "Acuile in Comun" instaladis difûr dai palaçs dai 130 Comuns che a àn aderît al progjet inviât vie pe Fieste dal 2025. La iniziative, promovude de Region Autonome Friûl-Vignesie Julie e de ARLeF, e vûl valorizâ e promovi la identitât furlane. A ognidun dai Comuns che a àn aderît ur è stade regalade une opare artistiche che, logade fûr di un edifici rapresentatîf o intun altri lûc di interès storic culturâl, e concretize il leam dal popul furlan cu lis sôs lidrîs e la sô storie. L'autôr de opare al è il designer Stefano Borella che, tal realizâle, si è ispirât ae acuile de bandiere dal Friûl, il simbul che plui di ducj al ten adun i furlans. La organizazion de iniziative e je puartade indenant cu la colaborazion di City ADV.

LA FIESTE PRIME DE FIESTE

Come par tradizion, i Comuns che a dan acet ae Fieste, Dartigne e Montenârs, a àn jemplât un calendari di events colaterâi che a anticiparan lis celebrazions uffiâls.

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

Joibe ai 9 di Avrîl, aes 20.45, inte sale dal consei dal Municipi di Dartigne, al è in program il spetacul "Rombo. Live book" di e cun Martina Delpiccolo e Fabiano Fantini, suntun projet de associazion culturâl Colonos. Gjavade fûr dal romanç di Esther Kinsky, la opare, cemût che al spie ben il titul, e fâs un scandai inte memorie dal taramot che al scjassà il Friûl intal 1976. Il spetacul al vignarà metût in sene in colaborazion cul Teatri Stabil Furlan.

Sabide ai 11 di Avrîl, aes 20.00, intal centri polifuzionâl "Bons. Leone Quagliaro" di Montenârs, in vie Isola 10, al è in program l'incuintri "La ereditât di Pre Checo a 40 agns de sô muart", dedicât a pre Checo Placerean. L'event al è par cure dal Comun di Montenârs, Glesie Furlane, Clape di culture Patrie dal Friûl e Istitût Ladin Furlan. A dialogaran sul teme Claudio Sandruvi, pre Romano Michelot, Andrea Valcic e Geremia Gomboso.

SUL TERRITORI FURLAN PASSE 150 INIZIATIVIS

Ma nol è dut, parcè che, come ogni an, la celebrazion de Fieste de Patrie dal Friûl e sarà insiorade, su dut il territori furlan, di un calendari cun tancj events culturâi colaterâi, come spetacui teatrâi, events musicâi, presentazions di libris, e v.i. A saran cirche 150 i events promovûts dai passe 80 Comuns che a àn aderît al bant par sostignî lis manifestazions che a compagnin la Fieste, promovût de ARLeF in atuazion de Leç regjonâl n. 6/2015.

Il calendari dai events colaterâi ae Fieste al è disponibil sul sît www.arlef.it.

Udin, ai 2 di Avrîl dal 2026

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

Aprofondiments su la Fieste de Patrie dal Friûl

LA FIESTE DE PATRIE DAL FRIÛL - La Fieste de Patrie dal Friûl e je une manifestazion che si davuelç di 49 agns e che tal 2015 e je stade ricognossude cuntune leç de bande de Regjon Autonome Friûl-Vignesie Julie par ricuardâ e valorizâ lis origjins, la culture e la storie di autonomie dal popul furlan. Si trate di une ocasion par celebrâ, in comunitât, i valôrs culturâi e linguistics che i furlans si ricognossin ogni dì e che midiand di lôr a afermin la lôr identitât. Parcè che la Fieste e fâs propit chest, za de sô prime edizion, celebrade a Aquilee intal 1977 par iniziative di pre Checo Placerean.

3 DI AVRÎL, NASSITE DAL STÂT PATRIARCJÂL – La storie nus conte che ai 3 di Avrîl dal 1077, a Pavie, l'imperadôr Indri IV al à decretât la nassite dal Stât patriarcjâl furlan, metût tes mans dal patriarcje di Aquilee. Il Stât furlan al veve leçs sôs, un so esercit, al bateve monede e al jere un dai teritoris statâi plui grancj dai siei timps. Al durà fin al 1420, cuant che, dopo di une vuere intense, al fo conquistât de Republiche di Vignesie.

UN DAI PRINS PARLAMENTS – Stant ai storicis, il Parlament dal Friûl al è un dai plui antîcs de Europe. Al jere nassût des assembleis consultivis dai nobii e dal clericât, clamadis dongje dal patriarcje di Aquilee za dal secul XII indenant, par domandâ tribûts gnûfs in bêçs e oms in armis. In pôc timp, dut câs, il Parlament de Patrie al cjapà funzions legjislativis, amministrativis e judiziaris simpri plui largjis. Inte assemblee, dongje dai nobii e dai oms di Glesie, a jerin presints ancje i rapresentants dai Comuns. Al è stât un dai parlaments cun vite plui lungje inte storie: al lavorà par passe 600 agns, fin tal 1805 cuant che Napoleon lu sierà.

LA BANDIERE DAL FRIÛL, UNE DES PLUI ANTIGHIS IN EUROPE - La bandiere dal Friûl e je un dai simbui plui ricognossibii de Patrie, che ducj i furlans, ancje chei tal forest, si ricognossin. E je une des plui antighis in Europe e e je ricognossude, inte version moderne, de leç regjonâl 27 dal 2001. La acuile eraldiche di aur cu lis alis spleadis su cjamp celest si ispire al vessil antîc e prezîôs di Beltram, conservât intal Museu dal Domo di Udin e che al va indaûr al secul XIV: un drap cuadrangolâr magnific di sede colôr grise celeste, cun tal mieç une acuile cul cjâf bande çampe. Il cuarp, lis çatis e lis alis a son zalis, lis sgrifis rossis. La sô origjin e je dai timps dal Stât patriarcjâl furlan. Il vessil al jere part dal furniment funerari dal patriarcje Beltram di Saint-Geniès, restât su la catidre di Aquilee dal 1334 al 1350 e copât in maniere barbare di une conzure di nobii furlans. Il simbul de acuile, e lu confermin i reperts numismaticis, al caraterizave il Stât patriarcjâl furlan za ai timps di Volchîr di Erla, patriarcje di Aquilee dal 1204 al 1218.

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

